



T A R İ H VESİKALARI

Sayı: 8

Ağustos 1942

Cilt: II

MORA İHTİLÂLİ TARİHÇESİ VEYA PENAH EF. MECMUASI

[c. II. sayı : 7, sayfa 80 den devam]

hususunda gayret ve hizmet-i mezbûre ve meşkûreleri inkâra mecal yokdur Gayurâne metanet idüb cenglerini âmme müşahede eyledi ve cümle küffârın topları ve edevat-ı harbiyeleri kal'aya nakl olundu Bâlâda mestûr مسطور Mermeriye derbendini asker mürûrundan sonra küffâr yine sedditmekle inhizam-ı küffâr Anaboli'ye [1] Serasker-i zafer-esere ifâdeye dilâverin biri Rum kıyâfetine girüb (bir kelime okunamadı) cibâlden ubûr ve Anaboli'ye gitdi asker-ı mezbûr mahall-i mezbûrda meks eyledi.

Feth-i kal'a-i Anavarin

Balâda tahrir olunduğu üzere Küffâr Anavarin kal'asına istilâ itmekle Moton muhasarası def'inden sonra asker-i İslâm killet-i zahîreden muzayakada olmağla sipehsâlâr-ı zafer-şiar vâfir zahîre tedarük ve Tırapoliçe mahfazasına (muhafazasına) kıyam iden Beyzâde Ağa iki bin mikdarı asker ile zahîreyi ordu-i İslâma nakle tâyin olunub Ağa-i mumaileyh dahi uhde-i ihtimamına muhavvel kılınan zahîre nakli hizmetine bezli nakdîne-i himmet birle Mermeriye derbendine vürûdunda sedd-i mümaanaat iden küffârı ürküdüb ve ubûr idüb kal'ası pîsgâhında olan ordu-gâh-ı askere vürûdunda zahîreyi teslim ve askere taksim ba'dehu Anavarin kal'ası teshirine azimet eylediler Vürûdlarında kulüb-ı küffâra havf ve dehşet târi ve kal'a toplarının bir mikdarını sefinelerine nakl ve kusurunu barut ile lebriz ve paralayub ve iç kal'ayı dahi barut ile hedm idüb ba'dehu küffâr kasabada durmayub sefinelerine girüb asker-i İslâm dahi kal'ayı zabt idüb sefinelerinden ehl-i İslâm üzerine vâfir toplar endâhte idüb zarar isabet etmedi ve küffâr bir dahi Mora havalisinde durmayub derya cânibine azimet eyledi.

Feth-i kasaba-i Arkadya

Anavarin kal'as-i fethinden sonra Çatalcalı Hacı Ali Ağa tayin olunub vardığında sermest-i meygede-i isyân üzere olan küffârı ba'zen istîsal ve ba'zen istirkak ile gûşmâl mâadalarına ray virdi.

Feth-i kasabât-ı Kalamata ve Enduruse ve çiftlik-i Nişli

Hacı Osman Bey ve İsmail Ağa tâyin olunub da reh-i râstları olan çiftlik-i mezbûra vüsûllerinde kullelerine (kulelerine) vâfir manyalu ve usat-ı sâire kapanub cenge âgaz itmelerile asker-i İslâm açıktan hücûm itmekle bir-

[1] Nauplie : Tırapoliçe'nin doğusunda Nauplie Körfezinde.

[2] Navarin

kaç şehidleriyle mecruh olup hamle-i sâniyede lağamlar ile kulleleri hedm içinde olan küffârı istîsal ba'dehu Kalamata ve Enduruse kazalarını tathir ve gûşmal idüb reâyâsına ray virdiler ve mumaileyhima Kalamata kazasında meks eylediler.

Feth-i kasaba-i Mezistre

Mîrmîrandan İsmail Paşanın maiyetinde olan Mucurlu Ali Ağa sâir askerlerle tâyin olunup kasaba-i mezbûreyi feth ve civarında Ayapetroz[1] kazasını dahi tathir birle reâyâlarına ray virüb muhafazasına kıyam eyledi.

Feth-i kasabât-ı Karitene ve Londar ve Fenar

Kasabât-ı mezbûrûn ahâlileri varub usatı gûşmal ve ve reâyâlarına ray verdiler.

Gûşmal-i ada-i Sülice [2]

Ada-i mezbûr Anaboli'ye karibdir usât-ı kesîre tehaşşüd itmekle Anaboli'de bir (.) sefînesi bulunub ve kaiklere (kayıklara) asker vaz' olunub vardıklarında usâtı gûşmal ve istirkak mâadâlarına ray verildi.

Gûşmal-i usât-ı kaza-i Gördös

Kasaba-i mezbûr Mora derbendi ittisalinde olup Mora imdadına gelen askerin dahi memergâhı olmağla ve derbendci reâyâ dahi isyan itmemelerile etrâfı muhasara olmayub ancak kazasının (.) ve zirve-i cibâlinde tehaşşüd iden usâtın gûşmalleriçün bir mikdar asker varub nizama bend ve reâyâsına ray virdiler Kasaba-i mezbûre kal'asile ber namat-ı muharrer muhasara olmayub ve Anaboli'de Serasker-i zafer-
eser olmağla ve Benefşe [3] kal'ası sa'b-ül-mürûr olmağla ve Kestel kal'ası her tarafı derya olup muhasarasında usret olmakla muhasara olmadı Mâada kilâ-i Mora muhasara olmuşidi.

Gûşmal-i usat-ı Mayna

İnayet-i Bâri ve yümn-i hazret-i tâcdârî ve ihtimam-ı sipehsâlâr-i zafer-
şiarlarile cümle Mora cezîresi levs-i küffârdan tathir olmağla Mayna

[1] H. Petros: Tırapoliçenin cenup doğusunda.

[2] Nauplie körfezindeki Hypsili, Spezzia adalarından biri olacak.

[3] Monemvasia: Malée burnu ile nihayetlenen küçük yarımadaın doğusunda.

keferesi üzerine hücum olunması tasvib olunmağla Kalamata tarafından Hacı Osman Bey ve Kapucubaşı İsmail Ağa ve Mezistre tarafından Çatalcalı Hacı Ali Ağa ve sair asker tayin olunub Mayna kenarlarında vaki bazı kurâ ve kulleleri tahrib ve küffârı istîsal ancak gereği gibi derûnuna girüb zabt olunması için su bulunmamağla sakalara muhtac olduğundan başka deryâ cânibinden dahi sefâine muhtac ve asker dahi kalil olmakla Mayna'nın derûnuna hücum olunmayub etrafını tazyik ve hayyen ahz olunan bir Maynalı kapudanını Serasker-i nusrat-eser rehin tarikile Anaboli'de tevkif ve asker-i İslâm bu kadar gûşmelerile iktifa birle avdet eylediler.

Evsaf-i-Mayna

Ekser yerleri sengistan seksen yüz kadar köyleri tahminen yirmi bin küffâr olub ibtida Mora fethinden şimdiye kadar nizamına murad olunmayub Mora'ya bir düşmen zuhûr itdikde mesfûrûn dahi hayli keder virdiğinden başka mirîye dahi bir akçe virmezler bin yüz yirmi yedi tarihinde Mora'nın fethinde bir mikdar evrak (?) ve hâne Mora ile mahlûten kayd olunub bu ane gelince bir ahçe vermezler cizye ve âvârızlarını Mora reâyâsına tahmil ve defter tevzi edüb zecren lehüm (زجرألهم) tahsil itdiler Fethine İrade-i Seniye teallûk buyurulur ise usret yokdur ve bir münasib mahallinde deryâ kenarında bir kal'a bina olunub içine kifayet mikdarı asker vaz' olunsa masarifleri Mayna iradından çıkar ve mirîye dahi fazla irad kalur ve mahall-i mezbûr cem'i Frengistan caniblerinden Bahr-i Sefîd tarafına mürûr iden sefâin behemehal mahall-i mezbûrdan ubûra muhtaç olmalarıyle mahall-i ticaret olacağı ve müddet-i kalilede azim bir serhad olacağı ve ahâlisi fenn-i deryâyı kemaliyle tahsil ideceklerine iştibah değıldir Cenab-i Hak feth ve nizamını müyesser eyliye âmin Cennetmekân Şehîd Ali Paşa Mora'yı feth itdikde Mayna'ya iki üç kadı ve zabitân nasb eyleyüb ve sonra kemalile nizamını virmek ve bir serhad bina itmek muradı idi Ancak Nemçe'de inhizam vaki olmağla nizamı alâhâlihi kalub sonra dünya bir müddet âsûdehal iken Mora ahâlileri hakikatını Deraliyyeye ifade idüb nizamına murad etmediler Bu Âne gelince böyledir içinde mahsul var Köyleri ve zeytunları dahi çokdur Harîre varınca olur İradı vardır ve ağreb her ağustozda bildircin tabir olunan kuşlar deryâ canibinden gelüb karasına konduklarında Maynalı ellerile tutub tuzlayub fuçılara vaz' iderler Nizamına irâde-i aliye teallûkuna muhtacdır ve aleyh-it-tevfik.

**Evsaf-i Serasker-i Mora vezîr-i Aristo-tedbir
Muhsin Zâde [1]**

Zatinde gayûr ve sabûr ve âkil ve hamiyet sahibi vakur bir vezir-i bînazîr olub egerçi Anadolu'de menkûben ikamet idüb ve menkûb olmağla bazı mülâhazalarile her şeyi Deraliyye'ye tahrir itmezdi Lâkin bulunduğuz azîm lûtf olub sonra ba'de harâb-il-Basre بعد خراب البصرة fehvasınca Mora mansıbı kenduye tevcih olunmağla levs-i küffârın Mora'ya istilâ itmemesine sebep-i müstakil olub iki üç mâh mukaddem Mora mansıbı kenduye tevcih olunsa Mora'da kat'an ihtilâl olmazdı Her hususuna aşına idi Lâkin menkûb olmağla her hususî Devlet-i Aliyye tahrir itmezdi Cenab-i Hak zat-i sûtûde-simât-i vezîrânelerini cemî-i âfât-dan emin eyleye âmin Elli tarihlerinde Mosko keferesinin donanması gelecek değil iken ve deryâ tarafından mahzur yoğiken Mora muhafazasına Devlet-i Aliyye iki vezîrlerle bir kaç bin asker tâyin idüp biri muşarünilhyh olub şimdi ise Moskolu donanması alenen gelür iken ve Mora nihayet-i hudud olmağla deryâ tarafından sefer zuhûrunda behal Moraya düşmen musallât olacağı zâhir iken zulmiye akçe tahsili için fakat bir Mütesellim bulunması ne mertebe gafletdir Frbab-i basîret indinde hafi degildir Cenab-ı Hak cümlemizi ikaz eyleye âmin.

Zeyl-i ru'ya-i fakir

Moskolu'nun musalâha nizamı için Âsitâne-i aliyyeye Elçisi geldiği esnada müşahede olunan ru'ya-i fakir:

Beyoğlunda buldım ve gûya Elçi-i mezbûra ikram için büyük köşkler yapılmış ve Elçi-i mezbûr bir büyük ve yüksek köşkde bir sandalya üzerine oturub kıranta tahminen seksan yaşında bir âdem idi ve Devlet-i Aliyye'nin ricali yerde olub ayak üzerine Elçinin ikram ve hizmetine ihtimam iderlerdi ve Âsitâne'de her ne kadar saz ve mel'abe..... ve ayu ve maymunlar ve sâir mel'abeler cümlesi mevcut olub birer birer mel'abelerini icra iderlerdi ve Elçi-i mezbûr bir müddetden sonra insan suretinden çıkub ve kiremid renginden koyuca bir renkde bir büyük arslan suretine girüb ve etrafı nezâreye almak için köşkün kenarına gelüb Elçinin bu hâletini arslan sûretinde görünce Moskonun kuvvetine delâlet ider deyu ve ricâl-i Devlet-i Aliyye'yi bu hakaretden gördüğümden ru'yada bükâ ider iken ikamet itdiğim bir ağaç

[1] Muhsin Zade Mehmed Pş.

dibinde yanına bir âdem geldi Fakire der ki keder itme bu gördüğün suret hakikati üzere arslan değildir kâğıddan yapılmış mukavvadır üzerine bir mikdar su dökülse eriyüb mahv olur o âdem bu vech üzere bu cevabı tekmi itdikde fakir dahi bu sürûr ile bidâr oldum Allah-i teâlâ Habib-i Ekrem hürmetine tasdik eyleye âmin bihürmeti seyyid-il-mürselin.

Sefer-i Mora bu makamda nihâyet bulmağla acizâne nizam-ı ekalime dair tertib olunub zeyl-i evveliyat-ı risale-i çâkerânemdir.

Tarih-i sâl bin iki yüz senesine mürtesim oldukda kâşâne-i âcizânemde zâviye - nişîn-i uzlet iken kâh hâl-i melâlet - iştimalimi tefekkür kâh dûrbin-i ibret ile etraf ü eknafı ve zemâne halkının tavırlarını nezareye alub bahr-ı efkâr-ı âcizânem temevvüc ve sevda-i çâkerânem ba'zı esbab-ı tedbir-i nizam-î ekalimin terkimine taallûk ve işbu Mora seferinin risâlesine zeyl olarak tertibine cesaret olunmağla vaki olan kusurumu erbab-ı kerem el-afvü zekât - uz - zafer زكاة الظفر fehvasınca safh-i cemillerile setr ü afv buyurmaları vâbeste-i merhametlerine manuttur.

Askerî tâifesine dâir

Bir devlet ibtida-i zuhurunda zîr i hükümetinde olan asâkiri itaatde olub bahusus kevkebleri ikbal üzere olub memleket feth itdikce tevsî-i memâlik ve kesret-i celb-i ganâimde birbirile ittifak üzere olmaları olageldiği ve mülûk ve vüzera ve ümera ve vükelâ devletin böyle vaktinde askerî tâifesine olan muameleleri ve ba'zen taksiratlarını görmemeğe ve kezâlik askerî tâifesinin dahi müşarünileyhime olan muameleleri devletlerin temekkünü vaktinde olmaz Belki ol vakit ve hâle mahsus bir tavırdır ve nefis-ül-emir böyledir ve böyle olduğunu erbab-ı basîret fark itmeleriyle böyle vakte bu güne müsaadeyi caiz görürler ve ol devlet kemal ve kudret peyda itdikde kavmı safa ve rahat ve müknet ve ziyet tehassülüne meyyal olub ve her kasaba ve dahi kura ahâlileri iradeleriyle hareket idüb her biri bir tavır ve meşreb peydâ ider ve zabt u rabtları ve iktiza iden hidemat-ı aliyyede istihdamlarında usret olduğu ve ol devlet karib-ül-ahidde izmihlâl olacağı zâhir olmağla erbab-ı basîret fark itmeleriyle zîr-i hükmünde olan nufûs-ı kesîreyi bir kaç sınıfa taksim ve muayyen şûrûtlara bend ve kemayenbağî şûrûtlara mülûke varınca riayet ider ve bir kılı fenâpezir olmamak için iktiza itdikde sâir umûr-i cesîmeyi terk ve ol emr ve hususu azim umûr ittihaz ve devamıçün küllî ihtimam ve tedbir iderler Fealâhâzâ bu makule işleri vükelâ zâhir-i hal ile temyîzi kaydında zâhib olanlar hata idegelmişlerdir

Nizam her ne gûne olur ise olsun katl ve nefy ve musadere ile mutlak olmaz san'at ile olur Bir hususun nizamına murad olundukda âhar gûne tavr ile âhar hususu izhar ile nizamı murad olan iş tabiatile nizam bulur ve avâm-i nâs neden neş'et itdiğini vucûh ile fark itmezler Zira bazı hususun nizamı zımnında zâhir-i hal ile mubaderet itmiş nice nice sâdedilân kendilerini hedef-i tir-i melâmet etmişlerdir Nizam zımnında mülûk-i nasârâ askerlerini regmend [1] tabir eyledikleri bin nefer veya ziyâde askerinin Başbuğlarının talimleriyle tüfenklerini birden alub ve bırağub ve endâhte eylemeleri ve kıyam ve kuudları ve sâir buna benzer talimleri külle yevmin müdavemetlerini avam-i nas ve asker dahi kıyas ederler ki bir bu talim ile ceng esnasında ceng edüb hasmına mücerred galib olmak içündür Ancak bu gûne talimleri ve sâir gûne olan tedibleri yalnız ceng için olmayub deveye yular takub bir katarını şütürban çekdiği gibi bir regmendi [2] dahi başbuğı çeke ve şurûtlarına biri tecavüz eder ise ziyadesiyle icrâsına ihtimam edüb gafleti câiz görmezler.

(رجمنا الى صدايننا صدونا) reca'nâ ilâ sadadinâ çünkü bir devletin sinn-i nemâsından sonra askerî tâifesi ve ol devletin kavmi biacmahim باجمهم bir renk üzere iken zabt ve idare olunmıyacıkları ind-el-ukalâ zâhir olmakla ve bir sınıf askerleriyle âhar sınıfı zabt etmek için erbab-i basiret askerî tâifesini birkaç sınıfa taksim edüb be şart-i ân ki her ne gûne tertibliğine rabita verilmiş ise bir neferini ihrac ve âharını yerine koymak (bir kelime okunamadı) bir taburu tebdil etmek ve bir akçalık esâme almak ve vermek mutlak mülûk bilüb ruhsat-i aliyyesiyle ola ve vükelâ marifetleriyle olur ise bir kaç sene içinde bir heyyeti (hey'et) kesb eder ki zabitlerinde neferi kadar itibar kalmaz ve zabitleri neferlerine mazbut olmakla perişanlık alâmeti zâhir olur bu makule şurûtlara leyl ü nehar riâyet ve devamına ihtimam elunmak lâzımdır binaenaleyh devlet-i ebed-peyvend askerî tâifesini hâkimâne (hakîmâne) eğerçi tertib buyurub ancak bazı esbabda hiy-i tertibde kesret-i hurûb ve kıtal ve tevsî-i daire-i devlet ü memleket ile tevaggul olduğundan noksan olmasına bâis olub meselâ yeniçeri askeri ve tavâif-i sâire nefs-ül-emr nasârâ askerlerinden bir kat ziyâde bahâdır ve cengcû askerlerdir ancak şurûtu riayetine ve bazı nizamlarında gaflet olunmakla gerek Âsitane-i aliyyede ve bâhusus taşralarda medain ve emsar (امصار) ve kasabâtta ve kurâda sâkinûn olan sigar ve kibâr ve ehil ve nâehil ve reâyâ makuleleri voyvoda ve mütesellim ve sair zabitanın mu'hezelerinden (muahezelerinden) âzade olmak için her biri başlu başına kendusını yeniçer (yeniçeri) edüb ve cümle nâs heman yeniçer olub yek-reng şekline girüb ve bâlâda zikr olunan ukalânın

[1] Aslı «Régiment» olacak.

[2] Bu da «Régiment» olacak.

şurûtu ve tenassufları bi-lkülliye muattal kalmakla tavr-i evvelden ziyâde muhtell-ün-nizam olub bu makule askeri zabt ve cenge götürüb ceng etdirmek ve bilâ izin avdet etmemelerine tariki kalmaz heman derme ve çatma nefer-i âm (nefir-i âm) askerinden dahi fena bir asker olub iş görülmediğinden başka inhizam ve sair perişanlık ve acz ü fütûra bais olurlar hayfâ vezâif namiyle telef olan hazâin-i bîşumâra ve bu makule asker itaat etmez ve firar eder zira irâde-i hazret-i tâcdâriyle olmuş asker değildir kendü irâdetleriyle olmuş asker olub binaenaleyh mahsusen asker Zeyd ve Amr misillû muayyen olmamış oldu Bu hal ile ser-ikârda olanlar dahi bir iş göremezler zann-i galib-i âcizanemdir ki zirde zikr olunduğu üzere olsa münasib olmak gerekdir Cenab-ı Hak bâis-i emn ü rahatımız olan veliyy-ün-nimetimiz pa-dişâh-i islâm-ı Skendr-ihtîşâm efendimiz hazretlerinin vücûd-i merhamet-nümûd-i mülûkânelerin cemî-i âfatdan emin edub aduy-i devleti olanları makhur ve müdemmer eyleye âmin El-mülûku mülhemûn (الملوك ملهمون) fehvasınca kavi nizam ve rabıtaya muvaffak ve mukarin eyleye âmin. Naimâ merhum tarihinde buyurmuş bir devletin sinn-i [1] nemâ ve vukuf ve inhitatı vardır ve vücûd-i insana teşbih etmiştir Nefs-ül-emr adem-i idareleriyle mezkûr tavr-i selâse bulunur lâkin vücûd-i insan misillû değildir zira mevt ile tebşir olunmuşdur Ancak devletler her ne ise vaz' etdikleri kanunlarına riâyet ve dünya tarz-i âhar oldukça esbabiyle hâkimâne (hakîmane alacak) hareket olunsa ve bir asırdan bir asıra her husûs için iktiza iden mahv ü isbatı yoluyla etsele ol devlet zevâlden emin olur ve tavr-i inhitatı görmez ve bilmez ve bir devlet heman kırk kise (kese) irâdı var bir kimesne misillûdur rabıtası var ise mevtine kadar refah-i bal ile geçinür rabtası bulunmaz ise iradına şerikler peydâ olur ve etbanı idareye kadir olmaz her birisi söz sahibi ve iş sahibi olur iradını telef eder muhtacinden olur ve devletlerin mevti ilâ âhır-iddevrandır Bu takdirce asâkir-i yeniçeriyânın yedlerine verilen esâme kâğıdları olduğu mahalli zikr etmez heman birer serhad ittihaz edüb zikr eder ve bir mahalle tâyin olunsa serhaddim filândır der ve her biri birer mahalde bulunur ve bazıları istedikleri serhadlere asâme açarlar ve çokluk olurlar ve dâimâ ol serhad fitnedden emin olmaz ancak böyle olmasa her eyâlet ve sancağda ne mikdar kaza var ise her kazada ne mikdar yeniçeri var ise yedlerine verilecek esâmelerinde meselâ der ayâlet-i Rumeli der kazâ-i filân yahud der sancağ-i Selânik der kaza-i filân ve ismi ve babasının ismi ve şekli yazıla ve bir serhadde tahsis olunmaya ve deftere dâhi böyle zabt oluna böyle olunca her hazada ve eyâlet ve sancağda ne mikdar yeniçeri var

[1] Metinde sîn سین şeklindedir.

ise malûm olur hiyn-i iktizada sefere yahud bir serhadde tâyin olunmaları iktiza eder ise ya cümlesini ya bir mikdarını eyâlet veya sancağ ve kaza (yı) dahi tasrih eyleyerek emr-i âli ve ağa mektubu ve defter isim (ve) resimleriyle yazılır ihraclarıçün heman bir âdem gider ve serian ihrac eder tehire mecal kalmaz ve bu makule nizama bend olmuş asker seferden firar etmez ve ederi bulunur ise envâf tedib (envâ-i tedib olacak) mümkün ancak birisi iktiza etmez fakat ismini ceride-i yeniçeriyândan ihrac kâfidir vilâyetinin dahi mezmûm olacağından başka edna mertebe kabahat ile voyvoda ve mütesellimler ve sâir zabıtânın pençe-i darblarına giriftâr olmakdan ise mevtini irtikâb eder ve seferden firar etmez ve ederi bulunur ise bâlâda zikr olduğu üzere cerideden ihrac olmakla ve şurût-i mezbûr muteber tutulmakla yerine girmeğe mâl arz eder (eden) nice nice kimesneler bulunurdu Ancak mal dahi iktiza etmez yerine âharını koymak için vilâyetinin zabıtân-i yeniçeriyân marifetleriyle aslâh-ı mevcudu intihabbadehû ağaya arz oluna badehû ağanın arzile emr-i âli ve mucebince ağa mektubu sâdır olduğdan sonra ihrac olunanın yerine kayd oluna esâmesi verile ve şurût-i mezbûr bilfiil taraf-ı hazret-i tâcdârîden riâyet olunmağa muhtacdır ve böyle asker temyiz olacağında iştibah yokdur ve ber namat-i muharrer nizâm-i mezbûr verildikde eyâlet ve sancağ her ne ise kal'a var ise ve ol kal'ada yeniçeri ağası bulunur ise kadisi yine yeniçeri ağası ola ve ancak ol kal'ada ve kal'anın kazasında olan yeniçeriyâna hükmü cari ola ve kazalarında ve ağasız olan kal'alarda zâbit olmak için Âsitâne'den serhadlere gitdiği gibi bir yeniçeri ağası tâyin oluna ve eyâlet ve sancağ ne ise vali ikamet ettiği kal'a ise ve ol kal'ada yeniçeri ağası var ise tâyin olunacak yeniçeri ağası ol kal'ada ikamet eylemeye cesim âhar kal'ada yahud bir kasabada ikamet eyleye ve valinin ikamet ettiği mahalde kadimî yeniçeri ağası yoğise tâyin olunan ağa valinin ikamet ettiği kal'a veya kasabada ikamet eyleye ve sâir kazalarda ve yeniçeri ağası olmayan kal'alarda yeniçeriyâne zâbit olmak ağa-i mumaileyh içlerinden muteber ve ihtiyarlarından birini vekil nasb eyleye ve ber minval-i muharrer her bir eyâlet ve sancağda tâyin olunan birer yeniçeri ağası bâ defter zîr-i tah-tında (?) olan yeniçeriyânın alûfeleri ağa-i mumaileyhim ikamet ettiği mahalle salyanecisi götüre ve taksim oluna ve mevacibleri dahi bazı sebeb ile oldukları ayâlet ve sancağ malından havâle olunmaz ise mesafe-i baîdeden havale olunmaya civarda olan âhar eyâlet ve sancağ malından havâle oluna zira geç varacağından başka kesret bihûde masarif olur ve bu şurûtlar aziz ve muteber tutuldukca iş dahi beher hal aziz olur ve her eyâlet ve sancağ ber minval-i muharrer oluncak (olunduğu vakit) yeniçeriyân müceddeden tahrir muhtacdır atiklerden

(Arkası var)